

南林叢刊正集

二

南林黨列正集

二

南溥一聚落耳名不載於地誌自宋人小說昉之逮元戴表元乃著之於詩至正重修南溥城碑遂有鎮儒學之設而文獻闕焉不可謂非鄉土之羞也鑑自少病潘氏舊志體例之妄紀分野表科目幾同優孟衣冠虎賁言笑思與二三友朋改作之則吾白舫實有同志當是時里中故交劉疏兩方爲聚書之舉余適館於其家白舫朝夕過從兩人者常左右焉披檢叢殘上下議論余牽率舉業或得一編值有關溥事者輒怦怦爲之心動白舫則直刺取其所以歸已各奔走衣食眠琴山館藏書十餘萬卷旋亦煙沈星散泊余歸家已杳不可復問白舫棄其稿行萬里攬轡爲山川之大且遠客十餘年比還漢陽乃先梓其成書寄余洋洋灑灑益見其腹笥之富明年東還復出此屬予讀之則昔人一言一行遺聞佚事靡不畢具不特潘書從此可廢卽十餘萬卷不啻如在目前緬懷往昔人之度量相越有如此者昔竹垞在潞河憶故鄉土風成爲湖糧歌百首人但驚其博洽不知其初亦欲譔禾錄而未果予猶及見其手校嘉興府志丹黃爛然以不復得張元成書爲憾則讀白舫是詩當無以異也如比諸夢得竹枝鐵崖樂府抑末矣若夫體製之巨文辭之工淵明懷南邨舊居子美弔西川古蹟有全集在子曰遠山十里蟪蛄之聲猶在於耳亦姑自其近者始之

則此詩非予序而誰序之用不敢辭書以諗讀是卷者乙未閏六月同里愚弟張鑑拜譔

范君白舫家吳興南潯珂里靈光梓鄉文獻所作潯谿記事詩竹垞駕湖權歌流亞也余昔在漢上曾置案頭將爲付梓以南旋不果昨歲重來則刻工梅生玉溪已爲梓成詩用篆體從君原本也蓋君喜說文字嘗病六籍舊文相承傳寫多求便俗譌僞日滋故平日作楷偏旁每用篆體梅生遂仍其舊讀者苦之議爲修改則裒然大集勢有所難屬其弟子詩僧韻禪冒雨渡江就予商榷予謂古之文士無不精通小學凡將訓纂曉達神旨子虛上林始臻博麗則以古體寫今詩不得謂君之好異也昌黎云凡爲文章宜略識字今之學者以文字與小學判爲兩途故覺目迷五色耳然遇結體糾繆處微特他人苦之僕亦苦之欲求桓渾鍾嶸必兼侯芭徐楚金兄弟之長則牙曠益稀爲千古計似亦未稱善本因細校一過詩得七十首首二十八字合計不過二千字若以楷書匯錄各詩列之卷首則讀者便若列眉其徵引記載則如注之有疏綱之有目不難次第尋繹藉此轉移以通騎驛亦春秋調人法也君詩清遠澄澹全集余曾序之此書顛末及搜採繁富考訂精博張君序中言之綦詳若其詞文旨遠遇

事勤懲則君著書之本意讀者當自能得之毋藉鄙人之贅述矣書以復君卽以爲序道光丙申三月望日錢塔陳文述序於武昌黃鵠山房

曙平生抱歐陽不見西湖之恨浙東西名蹟勝區強半未接於耳交白舫范君始知烏程南潯鎮卽君之故里也讀君南潯紀事詩始知南潯風土物產之美山川人才之秀舟車絡驛闌纏聯正如朱文肅所云南潯雖鎮亦一大都會也明季諸生董若雨輯有潯書久嗟亡佚然所錄皆鄉先達藝文凡四十四人他無及焉國朝潘爾夔著南潯鎮志履絢相循得失參半君於是捃摭圖籍搜尋聞見繁稱肆引旣竭吾材又復運以精思綴之韻語如製錦然玄黃糾互織之濯之費亂成章如鑄劍然頑金委積灌辟已周精英煥發苟非胸有鑪錘目拭銀潢縱復罄勵仍落凡徑烏能生面別開而九變復貫若此哉則是編也不當僅以詞章目之卽謂之潯書謂之鎮志焉誰曰不宜獨念君寓匡濟之懷負經世之略使早乘時而興當必有所樹立垂聲兩間以施榮於鄉里不則棄其所學造承明之廬領柱下之職出馳轡軒入知制誥堂堂皇皇成一代有關係文字詎非盛事迺皆不可得徒以老大一處士行萬里路著等身書又懼其鄉之文獻久而就湮嘆寫晨吟釀就此典要不刊之作以備掌故而誨來學其心

良苦志亦足悲矣。曙楚人也。楚古多材地。榱桷梓足資纂輯。終無有論說及此者。而漢臯爲南朔通術。二水朝宗巍然一巨鎮。尙煩君以三千里羈棲之身。採數百年遺沈之事。成叢綵一書。奇擎而出。將與耆舊傳歲時記爭價。千春然則君文章之功。楚且受其賜。不獨南潯爲然也。適以弁言見譔。陳書載孝穆與總持唱和。乃言吾詩寄卿卷內。以傳曙之意。望亦復類是。故不以閹劣辭而樂爲秉牘焉。道光十有六年歲在柔兆裙灘月在奎如甲寅朔蒲圻張至曙。

潯谿紀事詩引用書目

漢袁康越絕書

宋山謙之吳興記

唐李延壽南史

宋王象之輿地紀勝

張鑑南湖集

談鑰吳興志

元孔行素信齋類叢

明太祖實錄

神宗實錄

會典

成化勞鉞湖州府志

劉沂春鳥程縣志

鄭準開國集

梁沈約宋書

唐魏徵隋書

宋樂史太平寰宇記

宋姜夔白石道人歌曲

周世南吳興志續編

無名氏南渡錄

元趙孟頫蘭亭跋

明世宗實錄

兩朝實錄備纂

一統志

嘉靖張鐸湖州府志

南康府志開名

王圻續文獻通考

王世貞皇朝盛事

徐獻忠吳興掌故集

袁袞胥臺集

董份泌園集

宗雷西吳里語

田藝蘅留青日札

袁宏道錦帆集

王同軌耳譚

李樂續見聞雜記

徐象梅兩浙名賢錄

董斯張吳興藝文補

又吹景集

茅國縉菽園集

華士燁蘭居集

朱國禎湧幢小品

王鑒姑蘇志

王道隆菰城文獻

潘永因宋稗類鈔

董嗣成青棠集

申時行賜閒堂集

吳國倫甌顛洞正續彙

屠應埈蘭暉堂集

沈德符萬歷野獲編

張溥宋史紀事本末

宋珏比王文集

董斯張吳興備志

又靜歡齋存草

茅元儀暇老齋雜記

孫淳梅綰居存草

韓純王近詩兼逸集

韓純王蘧廬詩

董 說寶雲詩集

董 東稼庵詩存

國朝金之俊息園老人集

董漢策四載詩存

朱彝尊明詩綜

朱羹尊曝書亭集

吳 綺林蕙堂集

夏 復續幸存錄

鄒 漪啓禎野乘

紀 遠風雨吟

萬 言崇禎長編

陳尙古簪雲樓禳記

溫 樸君子齋筆記

嚴民法養雲詩刪

董 說豐草廬集

董 樵蔗園詩集

張 儒西廬集

國朝董漢策九宜集

董漢策蓮閣詩鈔

朱彝尊靜志居詩話

毛奇齡勝朝彤史拾遺

溫斐忱蓬窩雜錄

邪氣集關名

查繼佐罪唯錄

高士奇江村消夏錄

趙吉士寄園寄所寄

鈕 琇觚賸

吳任臣十國春秋

鄭元慶湖錄

鄭元慶石柱記箋釋

湯學顯菰鄉葉居集

嚴述曾水利條議注

謝州散木集

徐嶽見聞錄

紀氏家譜

華氏宗譜

朱氏家錄

吳樞植太平閒話

張鑑蠅須館詩話

董含菰鄉贊筆

童國泰水利條議

王通蚓庵瑣語

董懋昭黼菴遺業

董氏家譜

溫氏家譜

陸氏家譜

阮元兩浙輶軒錄

張鑑秋水文約

張丹山澗錄

潯谿紀事詩

上

烏程 范 鏞 聲山

太康分縣幾經年飛鳥銜輿事森然今日畫船烟浦外按圖誰問古東遷

宋書州郡志東遷晉太康三年分烏程立元微四年更名東安昇明元年復舊吳興志續編晉郭璞欲移郡於東遷每立標輒爲飛鳥銜去其女亦善地理啓璞毋徙因舊制損益之可以永無殘破之虞璞從之其女今號遷城小孃子從璞廟食湖錄按續圖經郡置於吳而璞當惠懷之際避地東南事不相類乃於菰城云秦改縣爲烏程至晉始移治於茗霅之上烏程縣治卽古郡治又自相牴牾竊詳烏程治所當秦漢間已徙於今之郡中故吳寶鼎置郡詔謂永安故鄣等水悉注於烏程若在菰城豈得云此故知吳以前已在今處旣以縣爲郡則必卽縣治爲郡治而縣治他徙矣璞隨元帝渡江仕爲尙書郎損益古城之制相陰陽審向背庸有是理也今羅城之內茗水入西門餘不諸谿入南門至江渚匯合流爲霅水以出北門趨太湖西南諸山四環拱揖屏列於前北有覓峯盤踞於後子城居中面四水之衝挹衆山

之秀又處處多大谿廣澤故立郡以來無兵革之患意非璞不能定不必引飛鳥以神其事也 白石道人歌曲琵琶仙詞敘吳都賦云戶藏烟浦家具畫船惟吳興爲然春游之盛西湖未能過也已酉歲予與蕭時夫載酒南郭感遇成歌 輿地紀勝東遷縣在烏程縣東四十一里 勞鉞湖州府志按續圖經晉太康中析烏程東鄉爲東遷縣隋復併入今縣東四十五里尙以東遷名其地蓋縣治也且晉初析烏程四鄉爲長城卽今長興縣也東鄉爲東遷卽今東遷也長興地界在烏程之西數十里則東遷縣界亦當在東遷不遠今歸安縣界乃自城中與烏程分畫對治北自後石橋南至小市巷過儀鳳橋至甘棠橋以路及谿中分爲界城外以迎春門運河之南定安門餘不溪之北爲界非東遷舊界明矣 南湖集書東遷褚氏壁風晴舒望綠吹林蟻糧蒿田曲徑深淳朴山川追古俗蕭閒林谷許幽尋竄金不必多留子種德先須善用心動我耕耘平日興濁醪歸緩肯辭斟 按明一統志潯谿距縣東七十二里自運河東流與震澤鶯脰湖相接又烏程唐志南潯鎮埭縣治與吳江接壤今南潯西距東遷僅十餘里東百步卽震澤地則南潯舊屬東遷縣境明矣

佚志殘碑尙可稽當時沿革未全迷菰城古邑三唐後始識南林舊有溪

隋書地理志吳興郡統縣五平陳郡廢并東遷縣入焉勞志烏程戰國時屬楚爲縣曰菰城卽春申君黃歇之封邑也秦改爲烏程屬會稽郡漢參置侯國屬荊屬吳屬江都江都國廢復隸會隸永建中屬吳郡興平中分縣之餘不鄉爲永安縣三國時孫皓以侯居焉皓後卽祚寶鼎元年置吳興郡自是始爲郡治所晉析其西鄉爲長城東鄉爲東遷晉義熙六年徙縣治於州治西一里卽今之治所也梁以郡置震州乃以縣爲吳興郡陳仍爲縣隋平陳郡廢併東遷長城復入而屬蘇州仁壽二年復割縣爲長城立湖州大業二年州又廢唐武德四年復置湖州縣仍屬焉大歷十二年陞爲望縣自梁以來州郡有廢置更革而縣未嘗變也宋太平興國八年析縣之東南十五鄉置歸安縣元以郭內二廂屬錄事司而縣所管城外十二鄉五十三都一鎮元季張氏據郡廢錄事司丙午年歸附明太祖實錄洪武十四年十一月丁亥以直隸嘉興湖州二府隸浙江續文獻通考湖州府潯谿府城東七十二里有水自德清來與鶯脰湖接湖錄潯溪在縣東七十二里谿上卽爲鎮南潯鎮志潯谿在鎮北水清而湜居人取以釀酒甚佳是以潯酒聲

聞輦下 蘭亭跋蘭亭帖自定武石刻既亡在人間者有數有日減無日增

故博古之士以爲至寶然極難辨有鑄損五字者又有五字未損者獨孤長

老送予北行攜以自隨至南潯北出以見示因從獨孤乞得攜入都他日來

歸與獨孤結一重翰墨緣也獨孤名淳天台人 江村消夏錄趙文敏與直

夫姊丈札略云金釵一雙重二兩望姊丈親自看視卽換打造發去其餘有

可於南潯辦者并望用情區處南潯不必辦者已屬師舅往平江辦矣 養

雲詩刪南潯曲白蘋亭外西風度吹儂今夜南潯去別浦初殘金粟花歸舟

却繫斜陽樹留滯逢君最可憐襞羅衣薄霜飛天青聽悔結同心侶紅鳳虛

隨攜手仙琵琶聲碎若秋雨燈前暗與愁人語江上風濤足歎嗟春時花柳

關情緒楚舞吳歌一夕分當筵醉贈眞珠裙明宵置酒西樓望已隔南潯一

片雲 按南潯宋高宗紹興二年丁昌朝祇園寺莊田記稱潯谿理宗端平

元年李心傳報國寺碑記稱南林度宗咸淳六年敕賜嘉應廟額一稱南林

一稱南潯南潯之名始見於南宋前此無考

鎮戍監官古制存萬家烟火聚雲屯太湖水利關民政安定齋空執講論
吳興志竊考鎮戍置將起於後魏唐高祖嘗爲金門鎮將是也後齊以來列

爲四品唐制每五百人爲上鎮三百人爲中不及三百者爲下置將副掌捍禦又置倉曹兵曹參軍掌倉庫戎器之類自藩鎮勢強鎮將之權漸重以至五代爲弊益甚兵權分裂聚斂無藝故兵主于鎮將而財賦器甲則主于參軍鎮將又率用親隨煩苛刻剝無所不至民不聊生縣官雖掌民事束手委聽而已人至以長官爲戲置鎮繁多而每縣又有鎮者以此如安吉縣有安吉鎮德清縣有德清鎮他郡縣亦然國朝平定諸國收藩鎮權縣之有兵者知縣帶都監或監押陞朝官帶都監京官以下帶監押財賦則參委丞貳諸鎮省罷略盡所存者特曰監鎮主烟火兼征商至於離縣稍遠者則有巡檢寨云 又太湖舊有沿湖之隄多爲樓樓有斗門制以巨木甚固門各有插版旱則閉之以防谿水之走洩有東北風亦閉之以防湖水之暴漲舟行且有所權泊官主其事爲利浩溥後漸湮廢頗爲郡害 明世宗實錄嘉靖十八年九月丁巳添設浙江湖州府通判一員於烏鎮住劄主緝捕盜賊兼管治農水利 越絕書太湖周三萬六千頃其千頃烏程也去縣五十里 吳興志續編小雷山洞庭之東山屬烏程大雷山洞庭之西山屬長興 十國春秋吳越天寶八年置都水營田使以主水事募卒爲部號曰揀淺軍亦謂

之撥清命於太湖傍置撥清卒四部凡七八千人專爲田事治河築隄一路徑入吳淞江一路自急水港下澱山湖入海居民遇旱則運水種田澇則引水出田又開東府南河立法甚備 姑蘇志宋慶歷二年守臣以松江風濤漕運多敗官舟隨築長隄界於松江太湖之間橫截五六十里又修荻塘通湖州凡九十里 閉國集宋慶元間袁說友言浙中陂塘淪潰悉爲田疇水則無地可瀦旱則無水可戽不嚴禁之無復稔歲然則淤水爲田利少害多可見矣 吳興掌故集吳興當澤國上游其爲民政莫要於水利故安定先生 生在湖學特設水利一齋以教士人當時劉彝遂以水利名於官後世乃不講此是豈有用之學哉 荻城文獻洪武十年烏程主簿王福濬沿湖諸淪以泄天目諸山之水民甚稱便 明會典正德十六年濬湖州府大錢小梅等河及澆港七十二俾上源下委遞相容洩 暇老齋雜記熙甯七年興修兩浙水利議者謂苕霅二水出於天目之山而溢於太湖書曰三江旣入震澤底定今二江並廢獨一松江入海故太湖之水壅而吳興被患遂欲廢北關長安二壩上塘之渠與下塘相通又于餘杭之南湖引苕霅之水達于漕渠穿錢塘之市而入於江以紓吳興之患時多以爲然部使者檄餘杭主

薄葛書舉行視書舉以爲吳興之水歸於太湖太湖廣袤四萬八千餘頃旁占數郡其所灌輸非獨苕霅也書稱三江震澤說者不同就如議者之言則尋常溝瀆之流豈可以比二江之任只益紛擾耳且錢塘二壩其來久矣太役之興古人所重固執不可議者不能奪其事遂寢故龍圖閣直學士李公常時守吳興聞書舉之說貽書嘉歎部使者亦交薦之今吳之謠曰攤了長安壩沒了吳江港見上港之必不可通下渠也萬歷戊申餘杭南湖堰壞蘇湖俱成大浸撫軍移湖守陳幼學兼治之而定若非葛主簿則湖久爲浸矣崇禎長編崇禎元年禮部員外蔡懋德疏言三吳水利之不興已數十年吳淞江入海故道化爲平陸矣白茅七浦鹽鐵等洩水大川僅存一綫矣止劉家河尙通而泥沙漸淤亦非故蹟所以一遇淫霖太湖西來數郡山水奔注蘇松下流無從宣洩數百萬頃良田悉成巨浸夫臣鄉雖居一區財賦半天下况今邊警需餉仰給東南尤爲至急至切及今不治患日甚一日災棧易乘獨賑難望小民皮毛俱盡猝有他虞卽國賦將安所從出耶 張鐸湖州府志環湖之水悉注於太湖徵太湖民其魚乎所謂導水以疾趨太湖者水之道也決之而已矣至於決太湖之水以放於海其事固在蘇松 先王